



COMUNU DE ARRIORA  
Provìntzia de Aristanis

***Regulamentu po sa  
Toponomàstica e numeratzioni  
tzìvica***

*Aprovau cun Delìbera Consìgiu Comunali n. 36 de su  
26.11.2010*

## **Capu I – TOPONOMÀSTICA**

### **Art. 1 - Assinnatzioni de sa toponomàstica**

**1.** Est còmputu de s'Ufitziu Toponomàstica studiai e propòniri a s'esàmini de sa Giunta Munitzipali s'aggiornamentu de sa toponomàstica istradali.

**2.** Sa toponomàstica istradali, fintzas a candu si podit, depit poderai caraterísticas de omogeneidadi aintru de zonas definidas.

**3.** Si depit fai a mancu de atribui su matessi nòmmini a una via, unu largu, unu vìculu (es.: via Mazzini, largu Mazzini e vìculu Mazzini) po non fai burdellu.

**4.** Non si depit, salvu ecetzionis inderogàbilis, mudai sa denominatzioni de is àreas de circolatzioni, po non cajonai dannus econòmicus a is abitantis e a is atividadis, cumentis narant su D.P.R. 10-05-23 n.1158, e sa lei 23-06-1927, n.1188.

**5.** In casu de cambiamentu de denominatzioni de s'àrea de circolatzioni in una targa dedicada depit èssiri inditada sa denominatzioni chi ddu fiat in antis.

**6.** Is demandas de denominatzioni de àreas de circolatzioni novas podint èssiri intregadas dae:

- Sìndigu
- Cunsigeris Comunalis
- Comitaus Localis
- assòtzius a caràteri locali
- a su mancu 50 tzitadinus

Is demandas podint inditai sceti su topònimu, lassendi chi siat su comunu a scioberai a cali àrea de circolatzioni ddu giai, o puru podint fintzas inditai su logu de tzerriai cun cussu topònimu.

In ambadùs is casus, su chi intregat sa proposta de denominatzioni depit alliongiari una relata completa chi ispieghit poita si bolit giai cussu topònimu a un'àrea e chi acrarit totus is elementus chi podint portai a s'acollimentu de s'istàntzia, segundu is chi sunt is critèrius prevididus dae su regulamentu e sa normativa vigenti.

### **Art. 2 – Àpricu de is targas toponomàsticas**

**1.** Su Comunu a mesu de s'Ufitziu Tènnicu, providit a pòniri is targas chi inditant is denominatzionis de is àreas de circolatzioni, duncas in is vias, vialis, cursus, vìculus, pratzas etc. .

**2.** Is targas podint èssiri postas in su muru o in palus piticheddus ;in ambadùs is casus depint èssiri mannas cm.80 x cm.20 (h).

**3.** Is targas depint èssiri postas a s'inghitzu de sa strada, a manu manca e a un'artesa non prus pagu de mt. 2,00 de terra, ponendi còpias a ònnia ingruxiada.

### **Art. 3 – Ainas informàticas**

**1.** Is areas novas de circolatzioni fatas in su territòriu comunali depint èssiri adotadas dae sa cartografia comunali ufiziali, in antis de ddis pòdiri giai sa denominatzioni issora.

**2.** Non est possibili giai una numeratzioni tzìvica a àreas de circolatzioni chi non apant tentu una denominatzioni ufiziali.

### **Art. 4 – Comunicatzionis**

**1.** Candu si gait sa denominatzioni a una àrea de circolatzioni nova, s'Ufitziu Tènnicu ndi depit giai luegu comunicatzioni a s'Ufitziu Anàgrafi cun còpia de totu is àutus, po permitiri a s'Ufitziu de aggiornai su stradàriu.

## **Capu II - NUMERATZIONI TZÌVICA**

### **Art. 5 – Atributzioni de sa numeratzioni tzìvica**

**1.** A su comunu cumpetit s'indicatzioni de su nùmeru tzìvicu, s'Ufitziu Toponomàstica donat su nùmeru tzìvicu a ònnia atzessu a is àreas de circolatzioni.

**2.** Ònnia àrea de circolatzioni depit àiri una numeratzioni tzìvica cosa sua, sighendi sa sutzessionis naturali de is nùmerus, e candu incapitant atzessus diversus in su matessi edifitziu, is nùmerus podint èssiri acumpangiaus dae is lìteras maiùscolas de s'alfabetu.

**3.** Andant numeradas totus is gecas e is àterus atzessus chi andant dae s'àrea de circulatzioni aintru a is fràigus (D.P.R. 30-05-1989, n.223 art.42, c.1) est a nai fintzas is "garages" chi si incarant a s'àrea de circulatzioni.

**4.** Aintru a is fràigus depint èssiri numeraus is atzessus chi portant in domus o logus assinnaus a s'esertzìtziu de atividadis professionalis, commertzialis o similis.(D.P.R. 30-05-1989, n.223 art.42, c.1), sunt escluidus is garages aintru a is fràigus.

**5.** Su nùmeru tzìvicu non si giat a is intradas de is crèsias e de is monumentus pùblicus. Si in casu dae su monumentu si atzedit a àterus immòbilis cumententi a ufitzius, negòtzius e domus, insaras tocat a assinnai su nùmeru.

**6.** Candu is fràigus benint sciusciaus o candu si sciùsciant gecas de atzessu postas in foras, su meri depit comunicai a s'Ufìtziu Toponomàstica, una borta fata sa demolitzioni, is nùmerus chi ant a èssiri bogaus.

**7.** Si benint abertas intradas novas in fràigus chi esistint giai, is meris depint pediri a s'Ufìtziu Toponomàstica, cun domanda apòsita, s'atributzioni de is nùmerus tzìvicus de pònneri in is intradas.

**8.** Sa numeratzioni de is atzessus depit èssiri fata sighendi is normas istabilèssias dae s'istitutu tzentrali de statistica.

#### **Art. 6 – Rechesta po s'atributzioni de sa numeratzione tzìvica.**

**1.** S'inditu de su nùmeru tzìvicu si pedit a s'ufìtziu Toponomàstica, sighendi s'art.43 de su D.P.R. 30-05-1989, n.223, candu su meri o su costrutori presentant sa dimanda o s'autocertificatzioni de abitabilità o de agibilità.

**2.** Sa dimanda de atributzioni de su nùmeru tzìvicu depit èssiri acumpangiada dae sa modulistica chi serbit e chi est allongiada a custu regulamentu.

#### **Art. 7 – Regulas po s'atributzioni de sa numeratzioni tzìvica.**

**1.** Si costumata a fai sa numeratzioni tzìvica sighendi custus crìterius:

a) sa via cumentzat in sa parti prus acanta a sa sea de su comunu e sèmpiri e candu dae s'atzessu de prus importu.

b) is nùmerus paris sunt a manu dereta e is disparis a manu manca;

c) sa numeratzioni de is domus spartas est progressiva non considerendi chi s'agatint a manu dereta o manca.

d) in is pratzas sa numeratzioni est progressiva e cumentzat a manu manca de chi intrat dae s'atzessu printzipali.

e) in is istradas in ui ddu at fràigus feti a una parti, sa numeratzioni est o feti pari o feti dispari.

f) Si da una parti de sa strada non si podit costrui poita mancai ddu at unu frùmuni o àteras cosas, sa numeratzioni podit èssiri ùnica e progressiva.

g) po is logus chi non sunt ammantaus dae fràigus ma sunt destinaus a costruzionis novas, depint èssiri riservaus is nùmerus tzìvicus chi ant a serbiri.

#### **Art. 8 – Règulas po pònneri is nùmerus tzìvicus.**

**1.** Is nùmerus tzìvicus sunt postus in artu a manu dereta in ònnia intrada a un'artesa de m 2,00 de terra, salvu in casus particularis in ui ddu at cancellus o crasuras;

**2.** Is targas de is nùmersu tzìvicus depint tènneri custas caraterísticas:- Matonella in tzeràmica de forma retangulari cun àngulus non deretus cm. 15 x 15, cun fundu biancu, e s'oru asullu e is nùmerus in mesu a sa matonella sèmpiri de coloru asullu, cun s'istemma comunali in artu a manu manca (**Alligau A**);

- si podit iscriri fintzas su nòmuni de sa via o prazza in manera abbreviada.

### **Capu III - DISPOSITZIONIS FINALIS**

#### **Art. 9 – Òbrigus de is meris de is fràigus**

**1.** Is ispesas po sa furnidura de sa targa de su nùmeru tzìvicu e po ddas pònneri sunt a càrrigu de su comunu.

**2.** S'atributzioni de su nùmeru tzìvicu est definitiva salvu candu est su comunu a interveni in casu de netzessidadi.

**3.** Est fatu òbrigu a is meris de is domus in ui sunt is nùmerus tzìvicus de si ndi ocupai.

**4.** Chinisiat fatzat dannu, iscònciu o at a cuai su nùmeru tzìvicu at a èssiri castigau cun un'ammenda chi at a èssiri 10 bortas su valori de sa targa.

**5.** At a èssiri sa Polizia Munitzipali a cuntrollai e apricai sa santzioni, e a comunicai a s'Ufìtziu Tènnicu. ;

**6.** At a èssiri su chi at fatu su dannu a ripristinai su nùmeru tzìvicu.

**7.** Is meris de is fràigus ant a dèpiri providi a sa numeratzioni interna (Art. 10 - ùrtimu comma - lei 1228/54).

**8.** Po pòdiri àiri s'abitabilitàdi o agibilitàdi est d'òbrigu pòniri is nùmerus tzìvicus. (comma 2 de s' art. 43 de suD.P.R. 223/89).

**9.** Non si podint apicai is nùmerus tzìvicus chena s'autorizatzioni de s'Ufitziu Toponomàstica.

### **Art. 10 – Òbrigus de su Comunu**

**1.** Su Comunu depit aggiornai in manera fitiana sa toponomàstica e sa numeratzioni tzìvica.

**2.** Su Comunu ònnia annu depit garantiri sa cobertura finanziària de sa spesa.

**3.** A comporai e pòniri is targas depit providi s'Ufitziu Tènnicu Comunali.

**4.** S'ufitziu Anàgrafi depit providi a sa cumpilatzioni e aggiornamentu de su stradàriu de paperi e/o informàticu sighendi is inditus de s'ISTAT e custu regulamentu.

### **RIFERIMENTUS NORMATIVUS**

Custu Regulamentu est fatu sighendi custas leis:

TOPONOMÀSTICA :

- R.D. 10-05-1923, n.1158;

- Lei 23-06-1927, n.1188

ANÀGRAFI:

- Lei 24-12-1954, n.1228;

- D. P. R. 30-05-1989, n. 223.

Po su chi pertocat is protzeduras in matèria de EDILÌTZIA PRIVADA:

- D.P.R. 06/06/2001 N. 380

**Po su chi no est prevedidu dae custu regulamentu si rimandat a is dispositzionis e a is circularis de s'ISTAT.**